

Bizkaiko Foru Aldundiaren 120/2010 Foru Dekretua, azaroaren 16koa, zeinaren bidez Ekonomi Jardueren gaineko Zerga kudeatzeko arauak ematen baitira (BAO Azaroaren 24koa)

Toki Ogasunei buruzko 2005eko abenduaren 16ko 9/2005 Foru Arauak tokiko ogasunen baliabideen sistema arautzen du, eta horrexen bidez gauzatzen dira benetan Bizkaiko Lurralde Historikoko udalerrien autonomiaren eta finantza gaitasunaren printzipioak.

Udalen esparruan tradizioz handiena duten errekursoetako bat Ekonomi Jardueren gaineko Zerga da, 1992ko martxoaren 17ko 2/1992 Foru Dekretu Arauemaileak arautzen duena. Izan ere, foru dekretu horren bitartez onartu zen 1989ko ekainaren 30eko 6/1989 Foru Arauaren testu bateratua; alegia, Ekonomi Jardueren gaineko Zergaren benetako esparru normatiboa.

Foru dekretu arauemaile hori garatzeko eta zuzen aplikatzeko, 1991ko abenduaren 27ko 192/1991 Foru Dekretua onartu zen, zeinaren bitartez ematen baitira Ekonomi Jardueren gaineko Zerga kudeatzeko arauak.

Beste alde batetik, 2011ko urtarrilaren 1etik aurrera, zenbait aldaketa gertatuko dira zerga horren kudeaketan, eta aldaketan artean nabarmentzekoa honako hau: zerga ordaintzetik salbuetsita ez dauden subjektu pasiboek besterik ez dute osatutako zergaren matrikula. Horrek, kudeaketa nabarmen hobetzeaz gainera, zergapekoen zerga-betebeharrak sinplifikatuko ditu, eta, hori dela eta, dekretu berri bat onartzea komeni da, Ekonomi Jardueren gaineko Zergaren kudeaketari buruzko arauak emateko.

Hori dela bide, Ogasun eta Finantza Saileko foru diputatuak proposatu eta Gobernu Kontseiluak 2010eko azaroaren 16ko bileran eztabaidatu eta onetsi ondoren, honako hau.

XEDATZEN DUT:

1. artikulua. Matrikularen eraketa eta edukia.

1. Ekonomi Jardueren gaineko Zerga kudeatzeko, zergaren matrikula hartuko da abiapuntutzat. Bizkaiko Foru Aldundiko Ogasun eta Finantza Sailak urtero prestatuko du matrikula hori, eta matrikulan jasoko dira jarduera ekonomikoetan ari direlarik zerga ordaintzetik salbuetsita ez dauden subjektu pasibo guztiak. Zergapeko subjektu horiek ordaintzen duten kuota motaren arabera multzokatuko dira (estatuko kuota, probintziakoa edo udal kuota), eta honako maila hauetan sailkatuko dira: atala, dibisioa, elkartea, taldea, epigrafea eta azpiepigrafea. Ekitaldi bakoitzeko matrikula, berez, aurreko urteko abenduaren 31n itxiko da, eta urte horretan zehar gertatu diren altak, aldaketak eta bajak jaso behar ditu; baina, horretarako, urtarrilaren 31 bitartean aurkezten diren aldaketa- eta baja-aitorpenak gehituko zaizkio, baldin eta urtarrilaren 1a baino lehenagoko egitateei badagozkie.
2. Matrikulak honako atal hauek izango ditu, subjektu pasibo eta jarduera bakoitzeko:
 - a) Subjektu pasiboaren identifikazio-datuak: identifikazio fiskaleko zenbakia, izen-abizenak (pertsona fisikoaren kasuan), sozietatearen izena (pertsona juridikoaren kasuan) eta izena (Zergei buruzko 2/2005 Foru Arauak bere 34.3 artikuluan aipatzen dituen erakundearen kasuan).
 - b) Jardueraren egoitza eta subjektu pasiboaren zerga-egoitza.

- c) Jardueraren izena; hari dagokion taldea, epigrafea edo azpiepigrafea; zerga-elementuak (behar bezala kuantifikatuta), eta zergaren tarifak aplikatzen den kuota.
- d) Udalaren kuoten kasuan, baldin eta subjektu pasiboak beste lokal batzuk baditu udalerrin berean baina bere jarduera ez badu zuzenean lokal horietan egiten (zergari buruzko jarraibideko 14.1.F.h erregelak aipatzen duen legez), orduan, lokal horiek matrikulan jaso behar dira, haien azalera, kokagunea eta zergaren tarifak aplikatzen diren dagokien kuota adieraziz.
- e) Udalaren kuoten kasuan, baldin eta subjektu pasiboak bere jarduera egiten ez duen lokalak besterik ez baldin baditu udalerrin batean (zergari buruzko jarraibideko 14.1.F.h erregelak aipatzen duen legez), orduan, lokal horiek udalerrin horren matrikulan sartu behar dira, baina honako datu hauek jasota: subjektu pasiboaren identifikazio-datuak, haren zerga-egoitza, zer jarduera egiten duen, bai eta lokal bakoitzaren azalera, kokagunea eta kuota ere. Kasu horretan, azalerari dagokion zerga-elementuak soil-soilik osatzen dituen kuotak direla jasoarazi behar da.

3. Foru errekarua bereiz jaso behar da matrikulan.

2. artikulua. Matrikula jendaurrean erakustea.

- 1. Matrikula, adierazitako kuota edozein delarik ere, interesdunen eskura egongo da, eta interesdunek Bizkaiko Foru Aldundiaren Interneteko orrian izango dute matrikularako sarbidea; horretarako, kontsulta-formulario batzuk egongo dira, identifikazio-datu batzuk eskatuko dituztenak datu pertsonalak behar bezala zaintzen direla ziurtatzeko. Matrikula 15 egun naturalean zehar egongo da eskuragarri, martxoaren 1a baino lehen.
- 2. Udal kuoten kasuan, Ogasun eta Finantza Sailak urte bakoitzeko otsailaren 10a baino lehen bidaliko die matrikula udalei.
- 3. Matrikulak ikusgai daudela adierazteko iragarkiak Bizkaiko Aldizkari Ofizialean publikatuko dira, edozein delarik ere iragarri nahi den kuota mota. Horrez gainera, lurralde historikoan gehien saltzen diren egunkarietako batean ere publikatu beharko dira iragarkiok.

3. artikulua. Matrikularen aurkako errekurtsioak.

- 1. Matrikula publikatzeko ediktuan, haren aurka aurkez daitezkeen errekurtsioen berri emango da, bai eta adierazi ere zer organoren aurrean aurkeztu behar diren eta zer epe dagoen errekurtsioak aurkezteko. Epe horiek matrikula interesdunen eskura jartzeko epea amaitu eta biharamunean hasiko dira zenbatzen.

Matrikulan subjektu pasibo bat gehitzea, handik kanpo uztea edo foru dekretu honen 1. artikuluko 2. zenbakian aipatutako datuetarik edozein aldatzea, hiru egintza horiek, bada, administrazio-egintzak dira, eta egintzon aurka berraztertze-errekurtsioa (eskumena duen organoaren aurrean) edo erreklamazio ekonomiko-administratiboa aurkez daiteke. Goian aipatutako egintzen aurka berraztertze-errekurtsioa edo erreklamazio ekonomiko-administratiboa aurkezteak ez du ekarriko egintzon ondoko likidazio-ekintzak etetea, salbu eta beren-beregi hala egitea erabakitzen badute administrazioorganoak edo Foru Auzitegi Ekonomiko Administratiboak.

- 2. Udal kuoten kasuan, haien kudeaketa esleituta duen udalari jakinarazi behar zaizkio matrikularen aurkako berraztertze-errekurtsioak aintzat hartzearen ondoriozko zentsu-egintzak, matrikula horrek aipatzen duen ekitaldiko maiatzaren 31 baino lehen.

4. artikulua. Matrikulan alta emateko aitorpenak.

- 1. Ekonomi Jardueren gaineko Zerga ordaintzetik salbuetsita ez dauden subjektu pasiboek zerga horren matrikulan alta emateko aitorpena aurkeztu behar dute.

Horrez gainera, lehendik zergan ezarritako salbuespenen bat aplikatu izan duten subjektu pasiboek ere alta-aitorpena aurkeztu beharko dute, salbuespen hori aplikatu ahal izateko baldintzak betetzeari uzten diotenean.

Edonola ere, zerga-administrazioak ofizioz subjektu pasiboak gehitu ahal izango ditu matrikulan baldin eta badaki ezarritako eragiketa-bolumena gainditzeagatik salbuespena galdu dutela.

Jarduera batzuen azken kuota zero bada, bai tarifak aplikatuz emaitza hori lortu delako, bai organo eskudunek kuota zero dela erabaki duelako; bada, orduan, jarduera horiek egiten dituzten subjektu pasiboak ez daude behartuta alta-aitorpena aurkeztera. Salbuespena izango dira tarifen 1. ataleko 508. taldean sailkatuta dauden taldeak eta enpresen aldi baterako elkarteak, zeren talde eta elkarte horiek matrikulan alta hartzeko aitortpena aurkeztu beharko baitute, zergaren jarraibideetako 15. erregelako 3. puntuan ezarritako arauaren arabera (1991ko apirilaren 30eko 1/1991 Foru Dekretu Arauemailearen bidez onarturiko jarraibidea).

2. Aurreko paragrafoan aipatzen diren alta-aitorpenak bereiz aurkeztu behar dira, jarduera bakoitzari bana dagokiola, hala xedatzen baitu zergaren jarraibideetako 10. erregelako 3. paragrafoak. Aitorpenotan, besteak beste, jarduera sailkatzeko behar diren datu guztiak jaso behar dira, bai eta taldea, epigrafea edo azpiepigrafea zehazteko eta kuotaren zenbatekoa kuantifikatzeko behar diren datu guztiak ere.

Ekonomi Jardueren gaineko Zerga udal kuota bategatik ordaintzen denean, baldin eta subjektu pasiboak delako jarduera ekonomikoan zuzenean erabiltzen ez dituen lokalak baditu (zergaren jarraibideetako 14.1.F.h) erregelak aipatzen duen legez), aitortpen bana aurkeztu behar du lokal horietako bakoitzeko (goiko lerroaldean aipatu den aitortpenaz gainera). Dena dela, geroko likidazioari begira, azalerari dagokion zerga-elementua besterik ez da kontuan hartuko kasu horretan.

Estatuko edo probintziako kuotagatik ordaintzen denean, berriz, aitortpenean lokal guztiak eman behar dira idatziz, edozein direlarik ere haien kokagunea eta erabilera. Halakoetan, lokal guztien azalera batu behar da azalerari dagokion zerga-elementuaren balioa kalkulatzeko, salbu zergaren jarraibideetako 14.1.F.j) erregelak aipatzen dituen kasuan.

3. Lehenengo paragrafoko lehenengo lerroaldean aipatzen diren alta-aitorpenak jarduera hasi eta hilabete igaro baino lehen aurkeztu behar dira, Ogasun eta Finantza Saileko diputatuaren foru agindu baten bidez onartuko den ereduaren bitartez.

Lehenengo paragrafoko bigarren lerroaldean aipatzen diren alta-aitorpenak abenduan aurkeztu behar dira; hain zuzen ere, subjektu pasiboak zerga dela-eta ordaindu beharra duen urtearen aurreko abenduan.

4. Baldin eta subjektu pasiboak egiten dituen jarduerak talde, epigrafe edo azpiepigrafe batean edo batzuetan jasotzen badira eta horiei aplikatu beharreko tarifetako oharrei edo jarraibideko erregelei buruzko oharrek kuota handitzea edo gutxitzea badakarte, gorabehera hori beren-beregi jasoarazi behar da alta-aitortpenean, eta zer ohar edo erregela dagozkion azaldu.
5. Alta-aitortpena hartzeko eskumena duen organoak esku izango du aurkezleak aitortutako datuak justifikatzeko behar diren agiriak eskatzeko, bai eta aitortpenean aurkitzen dituen akatsak konpon daitezela eskatzeko ere.

5. artikulua. Matrikulan aldaketak egiteko aitortpenak.

1. Zergaren matrikulan jasotako subjektu pasiboak behartuta daude zergapeko jardueretan aritzean gertatzen diren aldaketa fisiko, ekonomiko edo juridikoak jakinarazteko aitortpenak aurkeztera, baldin eta aldaketok gorabeherak eragiten badituzte zerga horregatik egin beharreko ordainketan.

2. Aurreko paragrafoan aurrez ikusitakoa betetzeko, aldaketatzat jotzen dira, besteak beste, honako hauek:
 - a) Zerga-elementuek ehuneko hogeitik gorako gorabeherak izatea, gorantz zein beherantz.
 - b) Subjektu pasiboak zergapeko jardueran aritzean egin nahi dituen aldaketak, dela kuotetan gehikuntzak edo murrizketak aurrez ikusten dituzten oharrei heltzen dielako, dela halako oharrei uko egiten dielako.
3. Hala ere, ondoren azaltzen diren kasuak ez dira goikoen parekotzat jotzen, eta, beraz, haien ondorioz, baja-aitorpena eta, hala behar bada, alta-aitorpena aurkeztu behar da:
 - a) Estatuko edo nazioko kuotengatik zerga ordaintzen duten subjektu pasiboek zerga-goitza aldatzea, Bizkaiko Lurralde Historikotik beste lurralde batera edo alderantziz.
 - b) Udal kuota minimoen kasuan, jardueraren egoitza aldatzea.
 - c) Subjektu pasiboak tributazio-aukera aldatzea, tarifek kuota mota bat baino gehiago adierazten dutenean haren jarduerarako; hots, udal kuota, probintziakoa edo estatukoa.
4. Aldaketa-aitorpena egin ondoko zergalditik aurrera izango dute efektua aldaketek. Hori gorabehera, baldin eta subjektu pasiboek nahi badute artikuluko honetako bigarren paragrafoko a) eta b) idatz-zatietan aipatzen diren aldaketek berehalako efektua izatea, baja- eta alta-aitorpenak aurkeztu beharko dituzte, hurrenez hurren.
5. Goiko lehenengo paragrafoan aipatzen diren aitortpenak bereiz egin behar dira, jarduera bakoitzari bana dagokiola, Ogasun eta Finantza Saileko diputatuaren foru agindu baten bidez onartuko den ereduaren bitartez.
6. Zergaren aldaketa tarifetako oharren edo jarraibideko erregelen aplikazioari loturik dagoenean, gorabehera hori beren-beregi jasoarazi behar da aitortpenean, eta zer ohar edo erregela diren azaldu.
7. Aldaketa-aitortpenak hilabeteko epean aurkeztu behar dira, aldaketa eragiten duen gorabehera gertatzen denetik aurrera zenbatzen hasita.
8. Aldaketa-aitortpena hartzeko eskumena duen organoak esku izango du aurkezleak aitortutako datuak justifikatzeko behar diren agiriak eskatzeko, bai eta aitortpenean aurkitzen dituen akatsak konpon daitezela eskatzeko ere.

6. artikulua. Matrikulan baja emateko aitortpenak.

1. Jarduera bat dela bide zergaren matrikulan izena emanda dauden subjektu pasiboak baja ematera behartuta daude, jarduera horretan aritzeari uzten diotenean.
2. Jarduerari utzi eta hilabeteko epean aurkeztu behar dira baja-aitortpenak, Ogasun eta Finantza diputatuaren foru agindu baten bidez onartzen den ereduaren bitartez.

Subjektu pasiboa hiltzen denean, haren kausadunek egin behar dute baja-aitortpena, heriotza gertatu eta hilabeteko epean.
3. Baja-aitortpena hartzeko eskumena duen organoak esku izango du jarduera uztea argudiatzeko aurkezten den arrazoia zuzitzeko behar diren agiri osagarriak eskatzeko, bai eta aitortpenean aurkitzen dituen akatsak konpon daitezela eskatzeko ere.
4. Era berean, matrikulan baja emateko aitortpena aurkeztera behartuta daude salbuespen bat aplikatzea dagokien subjektu pasiboak. Aitortpen hori abenduan aurkeztu behar da; hain zuzen ere, subjektu pasiboa zerga ordaintzetik salbuetsita geratzen den urtearen aurreko abenduan.

Edonola ere, zerga-administrazioak, ofizioz, subjektu pasiboari baja eman ahal izango die matrikulan baldin eta badaki ezarritako eragiketa-bolumena ez gaintitzeagatik salbuespena galdu dutela.

7. artikulua. Aitorpenak non aurkeztu.

1. Alta-, aldaketa- eta baja-aitorpenak Ogasun eta Finantza Sailean aurkeztu behar dira.
2. Ogasun eta Finantza Saileko foru diputatuak arauak ezarri ahalko ditu zerga hori dela-eta aurkeztu beharreko aitorpenen aurkezpen telematikorako.

8. artikulua. Salbuespenak eta beste onura fiskal batzuk.

Eskabidezko onura fiskalak zergaren matrikulan alta hartzeko aitorpena aurkeztean eskatu behar dira.

Udalak berak kudeatzen dituen udal kuoten kasuan, Ogasun eta Finantza Sailek udal horri helaraziko dio eskaera, hark dagokion erabakia hartu eta interesdunari jakinarazi diezaion.

Ogasun eta Finantza Sailek kudeatutako udal kuoten edo probintziako eta estatuko kuoten kasuan, berriz, sail horrek berak hartuko du onura fiskal horren egokitasunari buruzko erabakia, eta berak jakinaraziko dio subjektu pasiboari.

Era berean, euren jardueran beste edozein onura fiskalez baliatzea dagokiela uste dutenek kasuan kasuko alta- edo aldaketa-aitorpenean jaso beharko dute beren-beregi gorabehera hori.

9. artikulua. Aldaketa- eta baja-aitorpenen ondorioak.

1. Zergaldi bati buruzko baja- edo aldaketa-aitorpenek haren ondoko zergaldiko matrikulan izango dute efektua, foru dekretu honetako 5. artikuluko laugarren paragrafoan aurrez ikusitakoaren kalterik gabe.
2. Baldin eta baja-aitorpena foru dekretu honetako 6. artikuluan aipatzen den epeetatik kanpo aurkezten bada, aitorpen egileak zalantzarik gabe frogatu beharko du jarduera zein egunetan utzi duen.

Halakoetan, aitorpena jasotzen duen organoak dagokion udalari jakinarazi behar dizkio bai baja bera bai frogatuta geratu den data hori, baina horrek ez du galaraziko jarduera utzi den datatik aurrera eman litezkeen likidazioen kontra egoki diren errekurtsioak aurkeztu ahal izatea.

10. artikulua. Jardueren datuak ofizioz gehitu, aldatu edo ezabatzea zentsuetan.

1. Kudeaketa organo eskudunak zergaren mendeko jardueraren bat (subjektu pasiboak adierazi ez duena) hasi, aldatu edo eten dela jakiten baldin badu, interesdunari horren berri jakinarazi eta 15 eguneko epea emango dio hark egoki ikusten dituen aldeko alegazioak egin ditzan.

Epe hori igarota, eta interesdunak eginiko alegazioen arabera, kudeaketa organoak ofizioz ekingo dio, hala egin behar izanez gero, zergaren zentsuetan egin behar dituen gehiketak, aldaketak edo ezabaketak egiteari, eta zer egin duen jakinaraziko dio subjektu pasiboari. Jakinarazpen hori Ogasun eta Finantza Saileko beste organo eskumendun batzuek ere egin ahalko dute.

2. Zergaren zentsuetan gehiketak, aldaketak edo ezabaketak egiteko egintzen aurka, foru dekretu honetako 14. artikuluan jasotzen diren errekurtsioak aurkeztu ahalko dira.
3. Matrikulan ofizioz eginiko aldaketek edo ezabaketek kasuan-kasuari dagokion epearen ondoko zergaldian izango dute efektua.

11. artikulua. Norbait jarduera jakin batean dabilela frogatzea.

Norbait zerga honen mendeko jardueretan dabilela frogatzeko, zuzenbidean onargarria den edozein bide erabili daiteke; zehazkiago esateko, honako hauek:

- a) Interesdunak edo haren legezko ordezkariak eginiko edozein zerga-aitorpen.
- b) Interesdunaren edo haren legezko ordezkarien onarpen bat, izapideren batean, ikuskapen-aktaren batean edo beste zerga-espedienteren batean jasotakoa.
- c) Interesduna jarduera ekonomiko batean dabilela agerian jartzen duten iragarkiak, zirkularrak, erakusgarriak, errotuluak edo publizitateko beste edozein prozedura.
- d) Edozein erakunde edo enpresatan eginiko kontabilitate-liburuetan edo erregistroetan eskuratutako datuak, erakunde-enpresotako arduradunek edo Administrazioak berak behar bezala ziurtatutakoak.
- e) Edozein agintarik bere kabuz edo eskumena duen zerga-administrazioak eskatuta ematen dituen datuak, eta, bereziki, udalek aurkeztutakoak.
- f) Merkataritza, Industria eta Itsasgintzako ganbera ofizialek, profesionalen elkarteek edo elkargoek eta ofizialki aitorturiko gainerako erakundeek emaniko datuak, bai haien kabuz eman badituzte bai eskumena duen zerga-administrazioak eskatuta bada ere.

12. artikulua. Ofizioz eginiko alta eta gehiketen likidazioak.

1. Ekonomi Jardueren gaineko Zerga udal kuota batengatik ordaintzen denean, Ogasun eta Finantza Sailak zentsuan ofizioz eginiko alta-, baja- eta gehiketa-aitorpenen zerrendak bidaliko dizkie zerga hori kudeatzeko hitzarmenik sinatuta ez duten udalei, egutegiko hiruhileko bakoitzaren ondoko hilean, erakunde horiek dagozkien likidazioak egin ditzaten.
2. Baldin eta Ekonomi Jardueren gaineko Zerga probintziako edo estatuko kuotengatik ordaintzen bada, Ogasun eta Finantza Sailak gauzatuko ditu ofizioz eginiko alta, baja eta gehiketen likidazioak.

13. artikulua. Zentsu- eta likidazio-egintzen jakinarazpena.

1. Matrikulan datuak aldatu, gehitu edo ezabatzeko egintzak subjektu pasibo bakoitzari jakinarazi behar zaizkio. Hala ere, baldin eta egintza horien edukia subjektu pasiboek berek aurkezturiko alta-, baja- edo aldaketa-aitorpenetatik ondoriozta badaiteke, aurkezpena egitean jakinarazitzat jo daitezke egintzok.

Horrez gainera, ez da beharrezkoa izango matrikulan datuak sartu edo ezabatu direla jakinaraztea baldin eta egintza horiek zerga-administrazioak ofizioz egin baditu foru dekretu honen 4.1 eta 6.4 artikuluetan ezarritakoaren arabera. Kasu horietan, egintzok dagozkion likidazio-egintzak jakinarazita joko dira jakinarazitzat.

2. Likidazioa egiteaz arduratzen den organo administratibo berak jakinarazi behar dio likidazio hori subjektu pasiboari, eta, zeregin horretan, Zergei buruzko 2/2005 Foru Arauko 100. artikuluan xedatzen diren baldintzak bete behar dira.

Ogasun eta Finantza Sailak esku izango du kasuan kasuko likidazio-egintzak goiko paragrafoak aipatzen dituen zentsu-egintzekin batera jakinarazteko, zerga hau kudeatzeko hitzarmen bat sinatu duen kasuetan.

14. artikulua. Zentsu- eta likidazio-egintzen aurkako errekurtsioak.

Foru Auzitegi Ekonomiko Administratiboari dagokio Ogasun eta Finantza Sailaren egintza jakin batzuen kontra aurkeztu diren erreklamazioak ebaztea; hain zuzen ere, honako gai hauei buruzko egintzen kontrakoez: ekonomi jardueren kalifikazioa; ekonomi jardueri izendaturiko

talde, epigrafe eta azpiepigrafeak, eta zergaren tarifak eta jarraibideak aplikatzen diren kuoten zehaztapena. Dena dela, halako egintzen aurka, aukerako berraztertze-errekurtsoa aurkez daiteke aurretiaz.

Era berean, Foru Auzitegi Ekonomiko Administrazioari dagokio Ogasun eta Finantza Sailak emaniko likidazio-egintzen kontra aurkezten diren erreklamazioak ebaztea, zerga hau kudeatzeko hitzarmen bat sinatu duen kasuetan.

15. artikulua. Kuotak ordaintzea.

Zergaren kuotak ordainagiri bidez kobratuko dira. Ofizios eginiko alta edo gehiketa aitortzen kasuan, likidazioa egiteko eskumena duen organoak bakarka jakinaraziko dio likidazioa subjektu pasiboari, eta hala kobratuko da kuota.

Edonola ere, zergaren kuota ordainagiri bidez kobratu ahal izango da foru dekretu honen 4.1 artikuluan ezarritakoaren arabera zerga-administrazioak ofizios matrikulan eginiko gehiketen kasuan.

16. artikulua. Egiartzatzea eta ikertzea.

1. Udalek berek kudeatzen dituzten udal kuoten kasuan, erakunde horietan eskumen hori duten organoek egingo dute Ekonomi Jardueren gaineko Zergaren ikuskapena. Probintziako eta estatuko kuoten kasuan, berriz, Ogasun eta Finantza Sailean eskumen hori duten organoak arduratuko dira zeregin horretaz.
2. Behin jardunbideak bukatuta, Ogasun eta Finantza Sailari bidaliko zaizkio, jardunbideotatik eratorritzen diren zentsuak alda ditzan.

Xedapen indargabetzailea

Indargabe geratzen da 192/1991 Foru Dekretua, abenduaren 27koa, Ekonomi Jardueren gaineko Zerga kudeatzeko arauak ematen dituenak.

Xedapen iragankorra

Bakarra. Ekonomi Jardueren gaineko Zergaren 2011ko matrikula osatzeko arauak.

Ekonomi Jardueren gaineko Zergaren 2011ko ekitaldiko matrikula, salbuetsita ez dauden subjektu pasibo guztiek osatzen dutena, 2010eko abenduaren 31n itxiko da, eta honako arau hauei lotuko zaie:

- 2010eko ekitaldian zehar egon diren alta-, aldaketa- eta baja-aitorpenak jaso behar ditu.
- 2011ko urtarrilaren 31 bitartean aurkeztutako aldaketa- eta baja-aitorpenak jaso behar ditu, baldin eta aitortzen 2011ko urtarrilaren 1a baino lehenagoko egintzei badagozkie.
- 2010eko ekitaldian zergaren matrikulan alta emanda izanagatik ere 2011ko ekitaldian Ekonomi Jardueren gaineko Zergatik salbuetsita dauden subjektu pasiboek ez dute matrikulan baja hartzeko aitortzen aurkeztu behar, ez eta enpresaburu, profesional eta atxikitzaileen zentsuan aldaketa egiteko aitortzen ere.

Beste alde batetik, 2011ko ekitaldian euren zerga-egoera aldatu eta salbuetsita egotetik salbuetsita ez egotera igarotzen diren subjektu pasiboak edo alderantzizko bidea egiten dutenak ofizios sartu edo ezabatuko dira ekitaldi horretako zergaren matrikulan, eta subjektu pasibo horiek ez dute aldaketaren berri jasotzen duen inongo aitortzen aurkeztu beharko.

Azken xedapena

Foru dekretu hau 2011ko urtarrilaren 1ean sartuko da indarrean, xedapen iragankorren xedatutakoen kalterik gabe, zeren xedapen horrek foru dekretua Bizkaiko Aldizkari Ofizialean publikatu eta biharamunean izango baititu ondorioak.